

	SYLLABUSI I PROGRAMIT TË TRAJNIMIT		F-042
	Prishtinë	v. 2.0	Faqe 1 nga 3

Kodi: 031

EDUKIMI PËR DREJTËSI SHOQËRORE

Tipi i programit: Plotësues

Hyrje

Programi i trajnimit “Edukimi për drejtësi shoqërore” është zhvilluar për të mbështetur zhvillimin profesional të mësimeve dhe profesionistëve të tjerë që punojnë me fëmijë, të rinj dhe komunitete të ndryshme, me synim forcimin e njohurive dhe kompetencave për promovimin e barazisë, përfshirjes dhe të drejtave të njeriut. Programi ofron një qasje të bazuar në drejtësinë shoqërore, duke trajtuar mekanizmat e diskriminimit, pabarazisë dhe përjashtimit social, si dhe rolin e edukimit në krijimin e një shoqërie më gjithëpërfshirëse.

Fillimisht, programi është konceptuar për profesionistët që punojnë me grupe të marginalizuara, duke synuar zhvillimin e aleatëve të aftë për të mbështetur pjesëmarrjen, fuqizimin dhe mbrojtjen e të drejtave të këtyre grupeve. Programi është hartuar nga ISSA (International Step by Step Association) në bashkëpunim me ekspertë të fushës së të drejtave të njeriut dhe edukimit për drejtësi shoqërore. Të drejtat për ofrimin dhe zbatimin e programit janë transferuar te KEC, që zbaton atë në kuadër të programeve të saj të zhvillimit profesional.

Qëllimet e programit

Programi i trajnimit “Edukimi për drejtësi shoqërore” ka për qëllim zhvillimin e vetëdijes kritike dhe kompetencave profesionale për njohjen, vlerësimin dhe promovimin e diversitetit kulturor, gjuhësor dhe etnik si vlerë themelore njerëzore. Programi fokusohet në ndërtimin e qëndrimeve gjithëpërfshirëse, në dekonstruktimin e paragjytimeve dhe stereotipeve, si dhe në forcimin e tolerancës dhe zhvillimit të dialogut ndërkulturor. Përmes një qasjeje të integruar teorike dhe praktike, pjesëmarrësit aftësohen të kontribuojnë në krijimin e mjedisve demokratike, të drejta dhe të barabarta, duke nxitur respektimin e të drejtave të njeriut dhe barazinë në nivel individual, shoqëror dhe institucional.

Me përvetësimin e këtij Programi pjesëmarrësit duhet të jenë në gjendje:

- të thellojnë njohuritë, të kuptuarit dhe ndjeshmërinë për mekanizmat që përjetësojnë dhe mbajnë sistemet e dominimit,
- të ndërtojnë përkushtimin ndaj procesit të ndërtimit të kapacitetit për transformim personal, profesional dhe institucional.

Përmbajtja

Programi përbëhet nga dy qasje të ndërlidhura dhe përfshinë këto tema:

Pasurimi i njohurive teorike: Thellimi i të kuptuarit të koncepteve kyçe si kultura, dallimet sociale dhe kulturore, mekanizmat e menaxhimit të diversitetit, zhvillimi i identiteteve të shumëfishta, si dhe drejtësia sociale, përfshirë mekanizmat që prodhojnë pabarazi dhe ushqejnë shtypjen, dallimin mes barazisë dhe

	SYLLABUSI I PROGRAMIT TË TRAJNIMIT		F-042
	Prishtinë	v. 2.0	Faqe 2 nga 3

barazimit dhe manifestimet e tyre në fusha të ndryshme të jetës. Po ashtu, forcimi i vetëdijes për rolin personal në nxitjen e ndryshimit shoqëror përmes aktivizmit dhe ndërtimit të aleancave.

Përmirësimi i shkathtësive praktike: Zhvillimi i shkathtësive për të vepruar në mënyrë efektive në dhe për kontekste të ndryshme, përmes dekonstruktimit të stereotipeve dhe paragjytimeve, forcimit të ndjeshmërisë dhe kompetencave ndërkulturore, përmirësimit të komunikimit ndërkulturore, si dhe ndërmarrjes së veprimeve të përgjegjshme. Kjo përfshin edhe përkushtimin ndaj një procesi të vazhdueshëm të ndërtimit të kapaciteteve për transformim personal, profesional dhe institucional.

Rezultatet për Modulin e parë – Ndërtimi i vetëdijes kritike

Pjesëmarrësit do të:

- zhvillojnë aftësitë për të menduar në mënyrë kritike për të kuptuar realitetin në formë të drejtë dhe angazhimin që duhet bërë për luftimin e padrejtësive,
- njohin nivelet e ndryshme të përgjegjësisë në përjetimin e dominimit sistematik,
- njohin strategjitë që u ndihmojnë në transformimin e ambientit të tyre personal dhe institucional.

Rezultatet për Modulin e dytë – Reflektim ndaj veprimit

Pjesëmarrësit do të:

- zhvillojnë dhe thellojnë të kuptuarit për stereotipet dhe do të zhvillojnë shkathtësi për t'i zbërthyer stereotipet,
- thellojnë të kuptuarit për format e shtypjes,
- mësojnë se si t'i zbatojnë strategjitë të cilat do tu ndihmojnë në transformimin e ambientit të tyre personal dhe institucional.

Punëtoritë janë kombinim i prezantim të njohurive teorike dhe punës praktike. Aktivitetet zhvillohen përmes punës në grup të madh, grupe të vogla si dhe punë individuale. Të gjitha aktivitetet bazohen në situata reale, me qëllim nxitjen e të menduarit kritik dhe angazhimin personal të pjesëmarrësve në procesin e reflektimit mbi padrejtësitë, shtypjen dhe mekanizmat e dominimit në kontekste të ndryshme private dhe institucionale. Për shkak se trajnimi trajton tema të ndjeshme dhe kërkon ndërtimin e një klime besimi, si dhe për të ruajtur vazhdimësinë dhe cilësinë e procesit, pjesëmarrja lejohet vetëm për ata që e kanë ndjekur trajnimin në mënyrë të rregullt dhe të vazhdueshme që nga dita e parë.

Grupi i synuar

Ky program u dedikohet punëtorëve të arsimit, juristëve, gazetarëve, përfaqësuesve të OJQ-ve, si dhe të gjithë atyre që tregojnë interesim për të përmirësuar njohuritë dhe aftësitë e tyre në lidhje me relacionet njerëzore. Për të siguruar mbarëvajtjen e trajnimit dhe cilësinë e punës në grup, numri optimal i pjesëmarrësve është 20.

Forma e organizimit/ Kohëzgjatja

Programi “Edukimi për drejtësi shoqërore” – trajnim për të rritur, përbëhet nga dy module dhe zhvillohet në formë punëtorish. Secili modul përfshin 24 orë trajnim, ndërsa intervali kohor ndërmjet zhvillimit të tyre është së paku tre muaj.

	SYLLABUSI I PROGRAMIT TË TRAJNIMIT		F-042
	Prishtinë	v. 2.0	Faqe 3 nga 3

Pjesëmarrësit që ndjekin vetëm modulin e parë pajisen me certifikatë për 24 orë trajnim. Po ashtu, pjesëmarrësit që ndjekin modulin e dytë pajisen me certifikatë për 24 orë trajnim. Kusht për pjesëmarrje në modulin e dytë është pjesëmarrja e rregullt dhe certifikimi në modulin e parë.

Certifikimi

Kusht për certifikim është vijueshmëria e plotë e 90% e trajnimit.